

Åråsvågen Velforening,
v/leiar Jarle Dalberg,
Åråsvågen 226,
5943 AUSTRHEIM.

Mob. 902 07 968

Åråsvågen 01.02.2018

Austrheim Kommune,
Sætremarka 2,
5943 AUSTRHEIM.

KOMMUNEPLAN-AREALDEL I AUSTRHEIM KOMMUNE 2017-2027

ANDRE GONGS OFFENTLEG ETTERSYN; HØYRINGSUTTALE:

Åråsvågen Velforening har 30 medlemmer som er hus- og hytteeigarar ved Øksnesmarka/Åråsvågen, og det er no 10-12 år sidan områda blei bygd ut. (BH 5, 6, og 9).

Vi vil på det sterkaste gå imot at det vert etablert industri/bergverk, eller anna naturøydeleggjande verksemd i Øksnesmarka, samt djupvasskai i Åråsvågen.

Øksnesmarka vert mykje nytta til tur og rekreasjon, og av Velforeninga sine medlemmer, og det var aldri nokon av kjøperane her ute i Åråsvågen som blei orientert om at det var planar om eit stort næringsområde med djupvasskai like i nærleiken.

For oss er det ikkje til å fatta at fleirtalet av den politiske leiinga i Austrheim kommune vil leggja til rette for «Industri og bergverk», med tilhøyrande store prosjekt når det gjeld anlegg og infrastruktur, og dette i urørd natur. Særleg ille vert det når vi veit at tiltaka heilt klart vil føra med seg at naturmiljøet og heile det biologiske mangfaldet i områda, som til dels er særst spesielt, vil verta påført uboteleg skade.

Og for å ta eit konkret døme, kva med havørna og oteren som held til i området i dag?

Likeeins er det utruleg at fleirtalet av lokalpolitikarane våre kan meina at det er greitt at bustadområder og tung næringsverksemd (rykta går på bygda) kan vera nære naboar.

Skulle dette blir ein realitet vil det gå på helsa laus for mange menneskje.

Kva slag næringsverksemd kan vi så venta oss her ute, på næringsområdet og på djupvasskaien, og som vi her skal meina noko om?

Det veit vi ikkje (men rykta går som nemd), og dei som veit, dei seiar ikkje noko med hald i. Dei omfattande planane for Øksnesmarka Ordføraren synte til i kommunestyremøtet 02.11.2017 verkar på oss mest som lause tankar og luftslott.

Djupvasskaien synest, underleg nok, å vera heilt fråverande i desse planane.

I høve til næringsområdet og djupvasskai vil vi tru det kan verta aktiviteter døgeret rundt, vekedagar og helger.

Her ute er det skjeldan vindstille, og lyd ber utruleg langt. Det vil seia at både fastbuande og hytteeigarar i området vil verta plaga med støv og støy nærast til alle tider.

Vi fryktar også at fisket i Åråsvågen vil bli dårlegare, (t.d. avrenning frå sprengingsarbeid og steinuttak, anna arbeid på området, og varig endra ferskvasstilførsle. Vi fryktar også at det kan verta restriksjonar på ferdsle i området ved djupvasskaien. (Jfr. Mongstad).

Vi meiner difor at Austrheim kommune sitt arbeid med å leggja til rette for næringsområde med djupvasskai i Øksnesmarka/Åråsvågen direkte skadar interessene til Velforeninga sine medlemmer, og dette etter at vi opplevde nærast å vere inviterte av Austrheim kommune til å byggja og busetta oss her ute.

For oss er næringsområdet og djupvasskaien også ei visuell ureining av et slag vi ikkje hadde trudd at nokon kunne gå inn for i vår tid.

Så er det slik at gjennom hausten 2017 har Multiconsult, på oppdrag frå Austrheim kommune, utarbeid «Konsekvensutgreiing og ROS analyse» for Øksnesmarka.

For oss verkar denne rapporten solid i høve sjølve Øksnesmarka, sjølv om vi tykkjer at den totale biologien i marka skulle vore breiare undersøkt, t.d. kva med amfibiar i myr og vassdrag? Eller med hjorten?

Vi undrar oss også over at Åråsvågen er vurdert berre i høve strandlinja. Det er ikkje sagt noko om sjølve Åråsvågen, det maritime livet der, og heller ikkje noko om fuglelivet i Åråsvågen.

Er Åråsvågen med hensikt ikkje teke med som del av oppdraget til Multiconsult? Og i så fall, kvifor ikkje? Velforeininga ser på dette som en klar mangel ved Konsekvensutgreiinga.

Heller ikkje er det vurdert om det eksisterande oppdrettsanlegget vil påverka det å kjøra større fartøy inn og ut av Åråsvågen, manøvrering av større fartøy i Åråsvågen, eller i kva grad Åråsvågen i seg sjølv er egna til å kjøra slike fartøy i.

Vi er også uroa i forhold til mogelege ulukker i forbindelse med den eventuelt auka skipstrafikken i Åråsvågen. (Jfr. Server-ulukka). Vil Austrheim kommune ha beredskap for å kunne handtera liknande hendingar?

Vi støttar sjølv sagt likevel Multiconsult sin konklusjon der dei slutteleg seier, sitat: «Øksnesmarka tilrås fortsatt å vera LNF». (s. 48).

I høve det mogelege næringsområdet i Øksnesmarka vil Åråsvågen Velforening også på det sterkaste oppmoda alle dei folkevalde i Austrheim kommune om å fylgje tilrådingane frå Multiconsult, og ikkje minst også tydeleg folkevilje, slik at Øksnesmarka og (deler av) Åråsvågen ikkje vert utbygd og øydelagt for all framtid.

Og til dei utbyggingsvenlege politikarane vil vi seia;

Tenk nytt, tenk framtidsretta, og ikkje minst – tenk på at etterkomarane våre og skal kunne ferdast i, og oppleve, urørd natur!

.....
Jarle Dalberg
Leiar i Åråsvågen Velforening

Kopi: Fylkesmannen i Hordaland

Skrivet er elektronisk godkjent og er derfor utan underskrift.